

# Kolosedan

## Poolbed Kolosedan Yaa Kerek Wongke Keendoon

### Kerek Kee Komo Dowad Wongkoon

Dudi kedmengkandi kuu Kolose aom meneboon kowe, Pool kuu kerek kee Rom yaambad wongkoon. Dudi kedmengkandi kuu: 1. Awinaab, anaab, dedmonaab andi ye amowamowiib, 2. Engyus kuu ari Yesu arebban ande kedmengkandiyiib, 3. Biknoon ye weng kanduwen andiyiib, 4. Okad yiri ye meeni kangdomiib kui. Kowe, Poolbed weng anammo Kolosedan yaa kedmengkande wongkoon. Wongkoon ye weeb kuu AD 60 areb.

### Korok Weng

1. Amun Kerundi Weng Ibduruk (1:1-2)
2. Kolosedan Yi Dowad Eso Ande Kurikuri Kami Ye Weng (1:3-14)
3. Keresu Kuu Korem Burudande Arimbed Anam (1:15-23)
4. Pool Anam Andiwendan Yi Dowad Deme Awinoon Ye Weng (1:24-2:7)
5. Nub Kuu Okad Yiri Ye Amowamob Yaa Kuu Keresumbed Dudboroone Obonmo Keruwen Ye Weng (2:8-23)
6. Karadmo Dobiri Kerekmen (3:1-4:6)
7. Yeenbon Kubendi Weng (4:7-18)

**1** <sup>1</sup>Pool, ne kuu God ye dowaken yaambad Yesu Keresumbed kinoona ye apaso keraan nub kuristen angkodmi Timoti yoom.

<sup>2</sup>Ma korondiyiibban Keresu yaa anam andimo doberembirimaib karadmodan Kolose aom doriib, yiib yaa kerek kee keenduub.

Kabamoon kondoon ye mimyob dowakeniib yewenubmo dobiriyiib kuu nuwambe God yaambad yiib yaa bangkandok.

### Yi Kurikuri Anam Andiwendan Yi Dowad

<sup>3</sup>Nub kuu yiib dowad nub Yariman Yesu Keresu ye Ambe God yaa kurikuri kerembirimaub kuu ye yaa eso andimaub, <sup>4</sup>amborom kuu

Yesu Keresu yaa yiiib anam andiyiib God ye karadmodan korem yaa yiiib mimyob dowaken keendiyiib wengamburuwen kowe. <sup>5</sup>Anam anam ye weng, weng amun kui, kuu yiiib yaa ibduruk monoon kuu Godbed Ewen arimbed komarewa kamaneen anam andidan yi dowad kuu yiiib wengambiriwen. Kowe, yiiib anam andiyiib mimyob dowakeniib kuu kuye weng yaambbed demboon. Kuye weng kunduk kuu, yiiib kuu anam kandanuub ande meedmiib kii.

<sup>6</sup>Okad yimin yimin korem kuyaom kuu weng amun kee monoon areb kuu kwane yiiib yaa monoon kii. Kwane, weng amun kee yiiib kumaom kuu idiib irimaan, kwane kawiiib yeederebene kainderebimaan. Okad yimin yimin korem kuyaom kuu kwamunemo kamimaan. Kukuu yiiib kuu weng amun kee aron ibduruk arimbed wengamberenib, Godbed kabamoon kondoon ye mimyob dowaken ye weng id anam korem yiiibkaadkeriwen. Kaadkeriwen kumbed mene ari kuu yiiib kuyaom kwamune areb kamimaan kui. <sup>7</sup>Yiib kuu nub deme mimo ye karub mimyob dowaken keenimaubman Epafras yaambbed yiiibkaadkeriwen. Ye kuu ma korondiyiibban kumbed Keresu ye deme awinimaan nub dowad. <sup>8</sup>Kwane, ye kuu yiiib mimyob dowaken Kingkin Karadmo yaambbed keendimaib kuu nub yaa daandoon.

<sup>9</sup>Kwamune ye dowadbed ibduruk yiiib dowad wengamburuwen kumbed mene ari kuu yiiib dowad womoniyiibban kurikuri kamimaub. God yaa kaamonimaub kuu kingkin ye kerekmen ye meeni kangdomiib kaadkeriyiib korem yaambbed ye dowaken yaa yiiibkaadkeri kuu yiiib inamen aom dembok anduwed. <sup>10</sup>Kwanikob, Yariman Yesu yaningko kankooni ye kerekmen yaambbed dobirime andi ye dowad kwane kurikuri kamuub. Yiib kuu kwane dobaraniib kuu yiiib yaa kubi darewoob kamendaneen. Kuye aningko kankooni kiwaan yena kuu, deme amunmo korem awinaniib kumbed yowiib iriyiib, God yaa kaadkeri yaambbed kaine amniyiib, <sup>11-12</sup>anam andi yaa erekmab anam ande doberembiri darewoowiib, yodbirimban iwarimbed doberembiri darewoowiib, kwamune bime andi ye dowad God ye aromkono nambiriyiib, ye kerekmen yaambbed aromkono korembbed aromniyiib, Ambe God yaa kubimo eso andiyiib, kui. Kuye God kuu nambirimo ye oonimbon aom ye karadmodan yi yumbon kuu yiiwiib ibmo dohiri dowad yiiib yaa yiminmo kerundoon. <sup>13</sup>Ye kuu kumunmo ye oonimbon yirimbed nub ben yaro ye mimyob dowaken keenoon ye Mingki ye oonimbon aom yuroon. <sup>14</sup>Kuye Mingki kuyaambbed nub kuu bidoon, kukuu nub ambarakmi kuu are nonondandoon kui.

### Yesu Keresu Kuu Kane?

<sup>15</sup>Yesu kuu wedmenindeban ye God ye kuru korokboon, ye kuu wonob dana mingki areb, ongmenaboob ye kumkam korem kuu

yirimo, yembedmo kuu ari. <sup>16</sup>Amborom kuu ye yaambbed kumkam korem kuu ongmenaboos kowe. Kumkam korem, Ewen ariyiyib okad yiriyiyib, wedmuuwiib wedmokbaniib, korok korok yi ooni yaromkono o aromkono maa maa ye yumbon o yarian yi yumbon o korok korok deme ye aromkono ye yumbon kwamune awene kui, korem kuu ye yaambbed ye dowad ongmenaboos. <sup>17</sup>Ye kuu yedin doroookob kumkam korem kuu ye yomanbed kwane dembe wonoon. Yi kuu ye yaambbed yiminmo doriib. <sup>18</sup>Kwane, anam andiwendan kuu ye id areb, ye kuu yi korok kui. Ye kuu bobnoon yirimbed ibduruk dembekore wonob dana keroon, kowe kumkam korem yaa yembedmo kuu ari. <sup>19</sup>Amborom kuu God ye kubi dowaken keroon kuu ye meeni koremiib inamen koremiib dowaken koremiib aromkono koremiib Yesu ye niindem aom angkeen kowe. <sup>20</sup>Kwane, Yesu yaambbed God kuu yeka ye yaa kunum keru ye kiwaan ongmoon, okad yiriyiyib Ewen ariyiyib korem ongmenaboos yi dowad. Kiwaan ongmoon kuu bon dowan keru yeman, ye umkan at ming arimbed onduknoon yaambbed ongmoon.

<sup>21</sup>Anukbed yiyib kuu God yaa ambabbed doberenib God ye bondan keru, amborom kuu yiyib meeniyyib kamiyyib kuu arewamo kowe. <sup>22</sup>Kumban kibikee yiyib kuu God yaa kunum keru, Keresu ye id bobnoon yaambbed. Kwanoon kuu yiyib kuu karadmo ongmendoka ye murubia arimbed demkoronmoyiyib yiyib yaa ambarakmiwen kii ande dedmone daandiyiibbaniib dobirime ande. <sup>23</sup>Kumban yiyib anam andi kumbed doberembaraniib kuu kwamunemo keraniib kumbedmo. Yiyib anam andi kuu yumburum ambab yiru kawenebe awingkanabemoon areb keru, weng amun aombbed Godbed kwananeen ande meedmi kuyaambbed ben kimyen winindo kumbed kui. Kuye weng amun kuu yiyib wengambiruweng, kwane weng amun kee okad yimin yimin yaa doriibdan yaa daandiweng, kwane weng amun keye deme karub keraan, ne Pool.

#### **Pool Ye Deme Anam Andiwendan Yi Dowad**

<sup>24</sup>Kwane, ne kuu yiyib anam andiweng ye dowad yaambbed durud yewediib kandaan kowe kubaan. Kwane, yimin kerindo ye durud yewed kuu ne id yaa yimin kere weneen, Keresu ye durud yewed ye kerekmen yaambbed. Kuu anam andiwendan yi dowad, yi kuu Keresu ye id kui. <sup>25</sup>Godbed deme kawoone anam andiwendan yi dememan keraan kuu, yiyib yaa God ye weng yiminmo korokbendok ande. <sup>26</sup>Weng kee kurin kurin yirimbed yemyeb kanbiknoona angkimboroona awoya yi awoya ma wedmindo kumbed mene ari kumban, kibikee God ye karadmodan yaa korokbendoon. <sup>27</sup>Id darewoob ye weng nambiriyiyib anukbed biknoon kee nub yaa monoon kuu, Godbed meeni ongmekore ambibkin koremdan kuyaom korokbendoon kuu Keresu kuu yiyib niindem aom doreen. Ye yaambbed God ye nambiru aom dobaranuub andi ye meedmi yeman.

<sup>28</sup>Kwane, nub kuu Keresu ye dowad dakme korokbendimaub. Nub kuu meeni kangdom korembed nimakarub korem yaa ongakdenub kedmengkandimaub, nimakarub korem kuu Keresu yaambéd demkoronmo keribka God ye kerebiri ari benmene bangkanem andi ye dowad. <sup>29</sup>Kuye dowad ye aromkono korem kawoon kumbed bamdaane ambangkimaan. Kuye aromkono kuu ne yaambéd deme darewoob ambangkimaan.

**2** <sup>1</sup>Ne dowaken yibkaadkerime andid, yiiwiib Laodiseadaniib ne ma wengawindodaniib yib korem ye dowad ninabe naawonmo ambangkimaan. <sup>2</sup>Ne kee kwamako, yib niindem aom aromne kubiyiib doberenib, kwane mimyob dowaken yaambéd kan mimo kerime. Kwananiib kuu God ye weng kanbiknoon kuyaa kaadkeri kumundinmo kere karekmiyiibban kere amun kerundi darewoob arimbed kandaniib. Kuye weng kanbiknoon kuu Keresu ye kui. <sup>3</sup>Ye aommo kuu meeni kangdom koremiib kaadkeri koremiib ye amun kerundi darewoob arimbed kuu bikdereboon. <sup>4</sup>Kee kwane yedmaan kuu yenambéd mene weng amun areb kumban id angkara kuu arewa kumbed ma nemengkande birandaib andi ye dowad. <sup>5</sup>Amborom kuu wuruk kuu ne kuu yiiwiib yaa dorokban kumban, ne mimyob aom kuu yib yoom doriin kowe. Kwane, yib konomdangmo nekdane dobiriyiib Keresu yaa anam andi kangdommoyiib wedme kubaan kii.

### Yesu Keresu Yaamo Kwane Doberembiri

<sup>6</sup>Kwani kowe, yib kuu Yesu Keresu nende yib Yariman keriwén kwamune areb kuu, ye kiwaan yaambéd winime. <sup>7</sup>Ye niindem aombed yib kuu yumburum kaare kaine amnenib, yib yaa komarewa kedmengkanduwen areb kuu yib anam andi kuu aromnibka, yib niindem aom kuu kube eso andiyiib muubne derendarok.

<sup>8</sup>Kudi wedmime, yenambéd okad kiri yi meendobi aombed meneboon ye wengiib dudi idiibban ye wengiib yaambéd yib ben ye dabderem yiri nongkobaib andid. Kuye weng kuu karub ye amowamowiib kingkin yi aningko kankooni ye amowamowiib yaambéd menebimaan, Keresu yaambédban.

<sup>9</sup>Kedi, Yesu Keresu kuu God ye meeni koremiib inamen koremiib dowaken koremiib aromkono koremiib doreen, kwane okad yiri doboroon kwamunemo. <sup>10</sup>Kwane, Keresu yaambéd ye meeni koremiib inamen koremiib dowaken koremiib aromkono koremiib kuu yib yaa bangkandoon. Ye kuu aromkono maa maa korem awinidaniib korok maa maa koremiib yi korok kui. <sup>11-12</sup>Yiib anam andiwen yaambéd Yesu bobnoon yirimbed nen demboon ye God ye aromkono yaa yib kuu baptais keriwén kuu, Yesu yoom mangkene ye yoom ben dembemoon areb keriwén. Kwaniwen kumbed kad wanabemoon areb Yesu yaningko

yaambed yiiib id ye dowaken kuu wankoraroon. Kuku karubbedban Keresumbed kwanoon.

<sup>13-14</sup> Kwane, anukbed yiiib amarakmi kuyiib yiiib id ye dowakenbed yiiib oonoon kuyiib yaambed yiiib kuu duknemoon areb dohiriwen. Kuyaron kuu Godbed Keresu kwamune areb yiiib kuu ongmoone wadkeriwen. Godbed amarakmi ye kakman kondi ye weng wongkooniib Moses yoom amob ongmooniiib kuu nub yaa manmo keroon. Kumban kuye weng kuu Godbed benwene at ming arimbed bakumbed kaare kinoon kumbed, nub amarakmi korem kuu are nonondandoon. <sup>15</sup> Kwane, Godbed aromkono maa maa korem awinidaniib korok maa maa koremiib bongme yi aromkono kankorarekore, Yesu komo kamoon yaambed nangbe burudandoon korokbi dowad yi kuu wedangkambed ben yi aromkono dowan kii ande damangkanden yaroon.

<sup>16</sup> Kwana kowe, yiiib komo ok o animan animaib o kurikurimbon o Sabat aron arimbed komo kamimaib kuye dowadbed yiiib kwane korondaiwe karub yenambed yiiib benwene wengyundandaib. <sup>17</sup> Keyeman kee kuruwakmo, amaan ari kwane menebanean andi ye kumunkingki yeman. Kumban anam anam yeman kuu Keresu yaambedmo. <sup>18</sup> Karub kane kuu yekareb kankubuni ye dudi inameniib engyus yaa kurikuri keriyiib yaa kube kamimaan kumbed, yiiib kuu yiiib trofi kandaib andi dowad yiiib ben abdon wanandameen kuu kebenime. Kuye karub kuu komo wedmoon kuye dowad weng miin doboob kerengkan dakmimaan. Kwane, ye kuu Kingkin Karadmo ye kerekmen yaa dorokban kowe, yeka ye inamenbed inamen ogoodmo maa maa bangkande kerengkan kere doreen. <sup>19</sup> Ye kuu Korok Yesu yaa wini ye kiwaan kuu nonondandoon. Nub Korok kee ye id kuu nub kuristendan kui, ye yaambed id kumundinmo kuu ingkanabooniib mekmeediibbed koromone ingkananmo wonoon kuu, Godbed ye dowaken komarewa kere kainok ande meenimaankob kaine winimaan.

<sup>20</sup> Yiiib kuu Keresu ibmo keriwenkob okad yiri dohiri ye amowamowiib yaa duknemoon areb keriwen kowe, komande okad yiridan areb kuye amowamob ye dabderem yiri dohirimaib? Amowamob kuu kei. <sup>21</sup> Kee awinaib, kee mokwaraib, kee dedmonaib, kui. <sup>22</sup> Keye amowamob awene kee ben awingkaniib kuu ma idiib keraanban, amborom kuu kuye amowamob kuu nimakarub yi kwanime ye wengiib nimakarub yi kedmengkandiyiib yaambed demboon kowe. <sup>23</sup> Kuye amowamob kuyaa wedmaniib kuu meeni kangdom areb ande meenaniib, yika yi inamenbed kurikuri amowiib yika dabderem yiri kankubuni ye dudi inameniib id yaa kamkonomo keru ye inameniib kowe. Kumban kuye amowamob kuu aromkonoyiibban kowe id ye dowaken yaa ma kebenindeban.

### Karadmo Yaambed Dobiri Ye Kerekmen

**3** <sup>1</sup> Yiiib kuu Keresu yoom ibmo ben demboondan kowe, inamen arimo awine kande doberembirime, Keresumbed God ye wiwi angkambed

dibeen ye inamen kui. <sup>2</sup>Yiib meeni korem kuu bene kandunib inamen ari yaamo kiribenib meendobime, okad yiri ye inamen yaamban.

<sup>3</sup>Amborom kuu yiib kuu kwane dukniwena yiib wadkeri kuu Yesu Keresu yaa daboknenib ibmo bikniwen, Godiib aom bikne angkeen kowe. <sup>4</sup>Yiib wadkeri anam kuu Yesu Keresu kowe, aron kwane ye kuu mene angkadaraneen ari kuu yiib kwangkong ye yoom ibmo nambiriyiib angkadaraniib.

<sup>5</sup>Kwana kowe, yiib id ye dowaken ye inamen korem kuu ben kirarundime, nenem kami ye inameniib anon dowomkim yaa doberemoon areb ye inameniib nenem kami ye moomiib meeni dowaken miin arewayiib yiribman yemoon bi ye inameniib kui. Yiribman yemoon bi ye inamen kuu God kankubune yiribman kankooni ye inamen. <sup>6</sup>Kuye inamen korem kuu meneboon kowe, God ye norin arewa wandi yaron kuu mananuun kii. <sup>7</sup>Kuye inamen korem kuu yiib kuu anuk yiri awine kande dohiriwen, anam andindo yaron kui. <sup>8</sup>Kumban kibikee keye inamen awene kuu yiib niindem aom ben kirarundime, noriniib arud naawoniib inamen miin arewayiib wengamborokbanabiyiib weng komyengiib kui. <sup>9</sup>Kwane, yiib kuu neman dudanoon dudanoon kamaib, amborom kuu yiib kuu anuk yiri dohiri ye kerekmeniib kuye kamiyiib yaa kuu koronde kirarundekorib, <sup>10</sup>dobiri yeweb awine kandiwen kowe. Kuye dohiri yeweb kuu kuye dohiri kiwaan ongmoon ye God areb kere ye yaa kaadkeri yeman. <sup>11</sup>Kuye dohiri kerekmen yaambed andokbe yeka yekayiibban, Gurikdan kuu yika Yuudan kuu yika kuyiibban, kad wandiwendan o kad wandindodan kuyiibban, ambibkin maadan kuu dohiri arewa andi yemanban o ambibkin maadan kuu inamen miin arewa andi yemanban, yena yi dabderem yiri dobere no deme awinembiridan o yika oone obonmo doriibdan kuyiibban kui. Kedi, Keresu kuu meeni darewoob arimbed, kwane ye kuu ye karuwa nimaya korem ye niindem aom doreen.

<sup>12</sup>Kwana kowe, yiib kuu Godbed kingkane yeka ye dowad ben yuroondan, yiib kuu yembed mimyob dowaken darewoob keendoon kowe, mimyob keendiyiib awandiyiib yiibka kankubune yena kuu arimo andiyiib ingmiyiibban nangkemmo dohiriyiib yodbirimban emamombed meedme dohiriyiib kuu yiibka inware dohirime. <sup>13</sup>Kwane, yiibka kwamune awiniwo nub kwangkong awinuuwo kaminok andime. Kwane, neman komo ambarakmewen korondaan kii ande nonondandoko neman komo ambarakmoon kwangkong kwane nonondandoko kamenabime. Yarimanbed yiib ambarakmi yaa kuu are nonondandoon kwamune areb kuu, yena yi ambarakmi yaa are nonondandime. <sup>14</sup>Kuye inamen amun awinibka ari kuu mimyob dowaken keendime. Kwananiib kumbed yiib kuu dabokne mimo anammo keraniib.

<sup>15</sup>Kwane, korondiiwo Keresu ye yewenubmo kumbed yiib niindem aom dawuro oonendok, amborom kuu yiib kuu id mimo keruwen kowe

yewenubmo dobiri dowad yiib yaa baande kinoon. Kwane, eso ande dobirime. <sup>16</sup>Meeni kangdom korem yaambed neman kedmengkane ongkanoon kedmengkane ongkanoon kamibko, yiib niindem aom kubi dowakeniib kumbed God Ye Weng ye yookiib God yaningko kankooni yookiib kurikuri yookiib wingkanabime. Kwamibko, Keresu ye weng amun kumbed yiib niindem aom yiminmo muubnok. <sup>17</sup>Kwane, weng dakmi yaambed o ambangki yaambed, komo komo awine kamandamiib korem kuu, Yariman Yesu yaambed Ambe God yaa eso andenib Yesu yaningko yaambed kwane ambangkime.

### Kuristendan Yi Dobiri Kiwaan

<sup>18</sup>Nima awadmiwendan, yiib kuu yiib karub yi dabderem aom dobirime, kukuu Yariman ye dowaken yaambed inamen amunmo kowe. <sup>19</sup>Karub awadmiwendan, yiib kuu yiib nima yaa mimyob dowaken keendime, yi yaa kena karunga kamaib. <sup>20</sup>Dana, yiib ena ambe yi weng korem wengambere awinime, amborom kuu kwamaniib kumbed Yariman kuu kubaneen kowe. <sup>21</sup>Awodkia, yiib kuu yiib dana yaa deekni weng daandaib, kwane daandaniib kuu yi kubi dowaken kuu biknaneen.

<sup>22</sup>Yena yi dabderem yiri dobere no deme awinembiridan, yiib kuu okad yiri yiib kangkodan yi weng korem wengambere awinime. Korok yi indob ari kumbedmo amun ambangkubko nub yaa kerengkandime ande meenaib, inameniib ambangkiiyib mimo keru ye inameniib Yariman yaa uniyiib kumbed yi deme awinime. <sup>23</sup>Komo kamiib kuu yiib inamen koremiib kwane ambangkime. Nimakarub yi dowadban Yariman ye dowad ambangkemoo areb kwane ambangkime, <sup>24</sup>amborom kuu yiib yiibkaad kwane ambangkaniib kuu Yarimanbed kakman kondaneen, Ewen ari yiib dowad kowi yeman. Kedi, Keresu kuu yiib Yariman keroone ye deme ambangkimaib kii. <sup>25</sup>Kumban, karub kanembed amarakmaneen kuu kuye dowad kakman kuu Godbed konaneen, kedi, karub kane kuu yaningko darewoowiib o embengiib kuu God kuu ma meenimokban kowe.

**4** <sup>1</sup>Kangkodan, yiib dabderem yiri dobere no deme awinembiridan yaa kuu yorokmo inameniib ibmo keru ye inameniib yaambed kamime, amborom kuu yiib yiibkaad yiib Kangkoman Ewen ari doreen kowe.

### Ari Ongki Weng Yenayiiib Dakmoon

<sup>2</sup>Yiib kuu kurikuri keru ye inamen darewoob kere kwane kame doberembirime, kerekberenmo dobiriyiib eso andiyiib kii. <sup>3</sup>Kwane, nub dowad kwangkoon kurikuriyib kamendime, kwane Godbed ye weng amun ye dowad nub yaa kiwaan nandok. Ye weng amun kuu God ye inamen biknoon kuu Keresumbed korokboon ye weng kuu nubbed kan

ari kedmengkandenmo yari yeman. Kuye dowadbed ne kuu nende sein nongbed yenbiwenkob dibiin. <sup>4</sup>God ye weng amun daandi kee kwanaked yimin kowe, yiyb kuu kurikuri kamibko dianbonmo dakma.

<sup>5</sup>Aron denekmen angkimboroka ma korondiyiibban kumbed yiybbed inamen kangdommo ye kerekmen yaambbed bunangka doriibdan yaa kamime. <sup>6</sup>Yiyb weng dakmi kuu korem kabamoon kondoon ye mimyob dowakeniib, amunmo karam ambod areb kerok. Kwananiib kuu nimakarub mimim korem yaa komarewa inandi yiybkaadkeraniib.

### Yeenbon Weng

<sup>7</sup>Taikaikusbed ne weng korem kuu yiyb yaa kanmene dakmaneen kii. Ye kuu mimyob dowaken keenimaub ye kuristen angkodmi, ye kuu ma korondiyiibban God ye deme awini ye karub, ye yoom ibmo Yariman yaambbed deme awinuwenman kui. <sup>8</sup>Ye kuu nenkowaana yiywiib yaa ku monoon kui, menene nub yaa komarewa keroon ye weng dakmi dowadiiwa, angkon yiyb niindem aom kuu aromne kubi dowakeniib kondi dowadiiwa, kumbedmo. <sup>9</sup>Ye kuu Onesimus yoom ku meniib kui. Onesimus kuu mimyob dowaken keenimaubman, ye kuu nub kuristen angkodmi ma korondiyiibbanman, ye kuu Koloseman, yiyb mimo yiybkanmo kui. Yi ayooobbed keyaambbed komo komo keroon ye weng korem kuu yiyb yaa daandaniib kii.

<sup>10</sup>Ibmo wii awunuwen ye karub maa yaningko Aristaakusbed kubendi weng yiyb yaa keendoon. Baanabas ye mongkob Maak ye kwangkon kwane keendoon. Yiyb kuu ye yaa komarewa awanenime ye weng kuu kandiwen kowe, yiywiib yaa monoka kubenime. <sup>11</sup>Yesu yaningko maa Yustus ye kwangkon kubendi weng yiyb yaa keendoon. Keye karub ayooobmim kee Yuudan, God ye oonimbon ye deme awinimaubdan kumaom kuu, Yuudan yenayiibban. Anam kuu karub ayooobmim kee ne mimyob wandi kankubune kubi dowakeniib kawiwen kii.

<sup>12</sup>Epafras, ye kwangkon Koloseman, yiyb mimo yiybkanmo, kwane ye kuu Yesu Keresu ye dememan, ye kuu kubendi weng yiyb yaa keendoon. Ye kuu yiyb dowad naawonmo kurikuri kamembirimaan, kingkin kerekmen yaambbed amnekoriib ma karekmiyiibban kerekoriib God ye inamen dowaken korem yaambbed kangdommo doberembirime anded. <sup>13</sup>Nembed ye dowad weng anam ke dakme korokbaan kei, yiyb dowad deme yobdood awinembirimaan, kwane Laodisea aom doriibdaniib Hierapolis aom doriibdaniib yi dowad kwangkon.

<sup>14</sup>Nub mimyob dowaken keenimaubman dokta Luk yoom Demas yoombed kubendi weng yiyb yaa keendiwen. <sup>15</sup>Ne kubendi weng kuu anam andiwendan Laodisea aom doriib yaa kondime. Kwane Nimfa yoom anam andiwendan yu ambiwoom nedbimaib yaa kwangkon kondime.

<sup>16</sup>Kerek kee kandenib kanwene yiyb kurikuri ambiwoombed kimingkaniib ye yondem kuu, anam andiwendan Laodisea aom doriib

yaa kondime, yi kurikuri ambiwoombed kimingki dowad. Ne kerek yi yaa wongkaan kwangkong yi yaambed kanmene yiib kurikuri ambiwoombed kimingkime. <sup>17</sup>Aakipus yaa yedmenime, “Yarimanbed eb yaa deme kabdoona awine kandewen kuu awine downan kere, kuyaa korondaab.” andime.

<sup>18</sup>Pool, neka ne dingkimbed kubendi weng kee wongkaan kii. Ne kuu nende sein nongbed yenbiwenkob dibiin kuu monkone meenime. God ye kabamoon kondoon ye mimyob dowaken kuu yiib yaa kerok.